

“ვახტანგ მეფე ღმერთს უყვარდა”...



ერის მამა და სულიერი მოძღვარი წმინდა ილია მართალი ბრძანებდა: “დავიწყება ისტორიისა მომასწავებელია ერის სულით და ხორციით მოშლისა, დარღვევისა და წარწყმედისა. წარსული მკვიდრი საფუძველია აწმყოსი, როგორც აწმყო მომავლისა. რომელია სიმაგრე ჩვენი ცხოვრებისა და რომელი სიფუყე, ამას ახსნის ხოლმე მხოლოდ ისტორია და თუ იგი დავივიწყეთ, მაშინ, დავიწყებია ჩვენი ცხოვრების სათავე, ჩვენი ცხოვრების საძირკველი და თუ ეს ასეა, რაღაზედ უნდა ავაშენოთ ჩვენი აწმყო, ჩვენი მერმისი?”

საქართველოს ისტორიის არ დავინწყებას ემსახურება ქვემო ჭალის საჯარო სკოლაში მომზადებული პროექტი, რომელიც წმინდა კეთილშესახური მეფის, ვახტანგ გორგასლის პიროვნების შესწავლას დაეთმო.

გვესაუბრება ქვემო ჭალის საჯარო სკოლის(დირექტორი ბელა ქენქაძე) ხელოვნების ისტორიის პედაგოგი, სამთავისის საკათედრო ტაძრის მედავითნე **ირმა(ელისაბედ) ზაქარიაშვილი**:

-საქართველოს ისტორია სისხლითა და ცრემლებით ჩაწერილი მატიანაა, რომელიც ჩვენს მომავალს სიყვარულითა და გულდასმით უნდა გავაცნოთ. დღეს, როგორც არასდროს, ისე ძალუმად გვჭირდება ისტორიის ხსოვნა, წინაპართა დანატოვარის, კულტურული მემკვიდრეობის პატრონობა.

ქვემო ჭალელი პედაგოგები, ჩვენი შესაძლებლობების ფარგლებში ვატარებთ საჩვენებლად გაკვეთილებს, კლასის საათებს, ღონისძიებებსა (ექსკურსიები ეკლესია-მონასტრებში) და პროექტებს...

ამჯერად, მოსწავლეებმა (დამრიგებელი ლელა კუდუხაშვილი) პროექტის თემად აირჩიეს წმინდა ვახტანგ გორგასლის პიროვნება. მათ მოიძიეს ინფორმაციები, შემდეგ დაახარისხეს და დაალაგეს თემებად. ისტორიის გაკვეთილზე ბავშვებმა შეძლეს შემდეგი საკითხების პრეზენტაცია: “ვახტანგ მეფის ოჯახი”, პიროვნება, გეოგრაფია-“გორგასალი”. მეფე-მეომარი, ღვთის მოშიში, თბილისის დამაარსებელი, ანდერძი. ლეგენდები და პოეტური სტრიქონები გულდასმით შეისწავლეს ქართული ენისა და ლიტერატურის გაკვეთილებზე (პედაგოგი მარინე მესროფაშვილი).

ხელოვნების ისტორიის ცოდნა მოსწავლეებს ეხმარება იკონოგრაფიული საკითხების წვდომაში. ინტერნეტის დახმარებით შეიტყვეს, რომ წმინდა ვახტანგ გორგასლის სახელობის ტაძრებია რუსთავში, კასპში და მიუნხენში (წმინდა მეფის სახელზე ეს ერთადერთი ტაძარია საქართველოს ფარგლებს გარეთ). თბილისის სიონს კი უწმინდესის ღოცვა-კურთხევით მიაშენეს ეკვდერი, რომელიც გორგასლის სახელზეა ნაკურთხი.

აღსანიშნავია ის ფაქტი, რომ ჩვენი რაიონისა და ეპარქიის უძველესი ტაძარი-სამთავისი, წმინდა ვახტანგის მიერ არის აგებული. არსებობს საისტორიო გადმოცემა, როდესაც ვახტანგ გორგასალი ოსებს ებრძოდა, ფიცი გაუტეხევას და ოსი ბაყათარი მოუკლავს. ცოდვის მოსანანიებლად მეფეს 4 ეკლესია აუგია: თბილისის სიონი, გაღმამხრის მეტეხი, წილკნისა და სამთავისის. სამთავროს ეკლესია დანარჩენ სამზე უკეთესი ყოფილა ხუროთმოძღვრებით და აღმშენებლობით. ამიტომ ეწოდა სამთავისი. აღნიშნული გადმოცემა იკითხება “დროების” 1875 წლის ფურცლებზე (პ. ჭალელი, კლდემაღალას ციხე (ისტორიული ლეგენდა).

-როგორც ვიცით, სასკოლო პროექტს მასშტაბები მიეცით და მოინახულეთ

“კლდემაღალას ციხე”, მოილოცეთ კასპის საკათედრო ტაძარი. რა კავშირი აქვთ მათ წმინდა მეფე ვახტანგ გორგასალთან?

- მოსწავლეებმა იციან, რომ კლდემაღალას ციხე მდებარეობს მდინარე ლეხურის ნაპირას, კასპი-იგოეთის შარა გზაზე. ციხეს ახლა არსენას ციხესაც უწოდებენ. ხალხური ლექსის მიხედვით, არსენას 700 თუმანი “კასპის ერთ დიდ კლდეში ზევსა”.

ვახუშტი ბატონიშვილი გავუწყებს: “ციხე, საითგან გამოიყვანეს ოვსთა, გორგასლის და”... კლდემაღალას ციხეს სტრატეგიული დანიშნულება ჰქონდა. ის დარაჯობდა და კეტავდა ლეხურის ხეობით მიმავალ ვიწრო გზას ჩრ/სამხრეთით. იგი იცავდა კასპს ჩრდილოეთიდან შემოჭრილი მტრისაგან. კასპის საკათედრო ტაძარი ერთ-ერთი დიდი ნაგებობაა სამთავისისა და კასპის ეპარქიაში. ბაზილიკის ტიპის ტაძარი 2012 წლის 13 დეკემბერს, წმინდა ვახტანგ გორგასლის სახელზე აკურთხა მაშინდელმა მღვდელმთავარმა, მიტროპოლიტმა ანდრიამ (გვაზავა).

ტაძარში მისულ ქვემო ჭალელებს შემოგვევება სამთავისისა და კასპის ეპისკოპოსი მეუფე დამიანე. აგრეთვე ტაძრის მწირველი მღვდელი გიორგი მურღული, რომელმაც დალოცა და უქადაგა პატარებს. მოსწავლეებმა მოილოცეს სინამდინდეები, წარმოთქვეს სავედრებელი ლოცვები... შინ მშვიდობით დაბრუნებულებმა კი საგზლად გამოიყოლეს მეუფე დამიანეს ლოცვა-კურთხევა, დარიგება. ღმერთმა ინებოს, რომ ჩვენც წმინდა მეფე ვახტანგ გორგასალივით ძალ-სულოვნებით გვეცხოვროს, ამინ!

